

四庫全書

子部

欽定四庫全書

太平御覽卷二十四

宋 李昉等 撰

時序部九

秋上

秋上

釋名曰秋者緇音秋也緇迫萬物使時成也

白虎通曰七月謂之夷則夷者傷也則者法也言萬物

始傷被刑法也

又八月謂之南呂何南者任也言陽氣尚有任生齊麥也
說文曰天地反物為秋字從禾焦省聲

易曰兌正秋也萬物之所說也

王弼注曰秋萬物成所悅也

書曰分命和仲宅西曰昧谷寅饑納日平秩西成宵中

星虛以殷仲秋厥民夷鳥獸毛毳

毳者謂落毛更生整理也

詩曰秋日淒淒百卉具腓

腓病也涼風用事而衆草皆病興也貪殘之政行而萬民

病困

又七月流火

流下也火星
中而寒暑退

又彼采蕭兮一日不見如三秋兮

禮曰七月之節日在翼昏建星中曉畢中斗建申位之
初其日庚辛其帝少皞其神蓐收其蟲毛其音商律中
夷則其數九其味辛其臭腥其性義其事言其祀門祭
先肝立秋之日涼風至後五日白露降後五日寒蟬鳴
天子居總章左个乘戎輅駕白駱載白旂衣白衣服白
玉食稻與魚其器廉以深太史先立秋三日謁於天子

曰某日立秋盛德在金天子乃齊立秋之日天子親率諸侯大夫以迎秋於西郊還乃賞軍帥武人於朝乃命將帥選士厲兵簡練俊傑專任有功以正不義詰誅暴慢以明好惡順彼遠方

又七月中氣日在張昏箕中曉昴中斗建申位之中處暑之日鷹乃祭鳥後五日天地始肅後五日禾乃登修宮室坏垣牆

又八月之節日在角昏南斗中曉畢中斗建酉位之初

律中南呂白露之日鴻鴈來後五日玄鳥歸後五日羣
鳥養羞是月也養衰老授几杖行糜粥飲食天子乃讎
以達秋氣命樂正習吹

又八月中氣日在軫昏南斗中曉東井中斗建酉位之
中秋分之日雷乃收聲後五日蟄蟲坯戶後五日水始
涸是月也祀夕月於西郊命有司享壽星於南郊日夜
分則同度量平權衡祭馬社

又九月之節日在角昏牽牛中曉東井中斗建戌位之

初律中無射寒露之日鴻鴈來賓後五日雀入大水為蛤後五日菊有黃花是月也命有司伐蛟取鼉登龜取

龜

又九月中氣日在氐昏須女中曉柳中斗建戌位之中霜降之日豺乃祭獸後五日草木黃落後五日蟄蟲咸俯是月也霜降始則百功休天子嘗稻先薦寢廟藏帝籍於中倉祇敬必飭是月也乃伐薪為炭

又秋斂冬藏義也

又西方者秋秋之為言愁也愁之以時察守義者也

周禮曰大司馬之職仲秋教理兵掌建邦之九法以佐

王平邦國

又司裘掌為大裘以供王祀天之服仲秋獻良裘季秋

獻功裘

又箒章氏掌仲秋擊土鼓吹豳詩以迎寒氣

鄭玄注曰
迎寒以夜

來諸
侯也

又司矢仲秋獻矢箛

弓弩成於秋矢箛成於夏箛盛
矢器也以獸皮為之箛音服

又南呂酉之氣八月建焉而辰在壽星

又秋見曰覲

覲之為言勤也共勤王之事也
大行人云秋覲以比天下功也

又秋獻龜魚

又司燿

音貫

掌行火之政令季秋內火

九月黃昏心星伏
在戌上使民內火

傳曰歲云秋矣我落其實而取其材

爾雅曰秋為白藏

又秋曰收成

又秋為旻天

李巡曰萬物成熟皆有文章
郭璞云旻愍也萬物凋可愍

又秋獵曰獮

獮殺也
順秋氣

漢書曰太白秋西方金義也言也義虧言失逆秋令傷

金氣罰見太白

又秋糶

如淳曰糶
音焦也

物糶斂乃成熟

漢書云八月賜大臣羊酒以助衰氣

漢書曰范式字巨卿與汝南張伯元為友二人春別京師以暮秋為期伯元以九月十五日殺雞以待巨卿母曰相去千里汝何信之也言未卒而巨卿至相隨上堂

再拜母極歡悅

續漢書曰仲秋祀老人星于國南郊

孟康漢書音義曰春曰朝秋曰請如古諸侯朝聘也師

古曰請音才性反

吳王濞不朝使人為秋請也

晉書曰袁宏孤貧運租自業謝尚時鎮牛渚秋夜乘月泛江會宏在舫中諷詠遣問即其詠史之作尚迎升舟與談申旦不寐自此名譽日茂

梁書曰朱异除中書郎時秋日始拜有飛蟬正集异武

冠上時咸謂蟬珥之兆

焦贛易林曰秋風生哀花落悲心

易通統圖曰日行西方白道曰西陸

尚書大傳曰萬物非秋不收

又寅饑納日平秩西成

傳曰天子以秋命三公將率選士厲兵以征不義決獄
訟斷刑罰趣收斂以順天道以佐秋殺

春秋感精符曰霜殺伐之表季秋霜始降鷹隼擊王者

順天行誅以成肅殺之威

穆天子傳曰仲秋甲戌天子東遊次雀梁

一宿為舍再宿為信過宿

為次蠹書于羽陵

謂暴書蠹蟲因目蠹書也

聖賢記曰馮夷弘農潼鄉隄首里人服八石得道為水仙河伯一又說華陰人八月上庚日渡河溺死天帝署為河伯

荆楚歲時記曰八月十四日民並以朱水點兒頭名為天灸以厭疾也

又以綿綵為眼明囊赤松子以八月囊承柏樹露為宜服後世以金箔為之遞相餉遺

西京雜記曰賈佩蘭云在宮時八月四日出雕房北方竹林下圍碁勝者終年有福負者終年疾病

又漢宗廟八月飲耐用九十日

王子年拾遺記曰漢武帝以季秋之月泛靈鷲之舟於臨池之上窮夜達晝以晝達夜於桂臺之下以香金為鈎縮紉為綸以丹鯉為餌不踰旬釣一白蛟長三四丈

若大蛇無鱗甲帝曰非龍也於是付太官為鮓而肉紫骨清香美無倫詔賜臣下時以上為神感所獲後更不得

續齊諧記曰弘農鄧紹八月朝入華山見一童子以五色囊承取栢葉下露露皆如珠子亦云赤松先生取以明目今八月朝作眼囊象此也

鄧明德南康記曰平固縣有湖中有石鴈浮在湖中每至秋石鴈飛鳴如候時也

尚書大傳曰西方者何也鮮方也鮮訊也訊者始入之貌
始入者何以謂之秋秋者愁也愁者萬物愁而入也故曰

西方者秋也

秋收
斂貌

尚書中候曰周文王為西伯季秋之月甲子赤雀銜丹
書入豐都止於昌戶乃拜稽首受取曰姬昌蒼帝子亡
殺商紂也

尚書考靈曜曰虛星為秋候昴星為冬期陰氣相位德
乃弗邪子助母合子符

虛星北方宿也昴星西方宿也
陰氣在秋冬助子母合符之弗

也邪

又曰政失於秋太白出入不常

毛詩傳曰壯士悲秋感陰氣也

詩含神霧曰秦地處仲秋之位男懦弱女高賒

賒明也
落消切

白色音中商其言舌舉而仰聲清而揚

三禮義宗曰九月大享帝於明堂之中孝經云宗祀文

王於明堂是也

又秋曰庚辛者庚更也辛新也言物皆改更而新也

又周祫以秋者萬物新成可以奉薦宗廟故合先祖之神而祭之故祫宜在秋也

又九月寒露為節者九月之時露氣轉寒故謂之寒露節霜降為中露變為霜故以為霜降節

春秋繁露曰秋之為言猶湫湫者憂悲之狀又曰秋怒氣故殺

春秋元命苞曰堯為天子季秋下旬夢白帝遺以鳥喙子其母曰扶始升高丘白帝上有雲如虎感已生皋陶

索扶始問之如夢言

又淮南子云
臯陶鳥喙

莊子曰舜以天下讓善卷善卷曰余立於宇宙之中冬
日衣皮毛夏日衣葛絺春耕種足以勞秋收之足以休
日出而作日入而息逍遙於天地之間何以天下為哉
入深山莫知其處

又荆之南有冥靈者以五百歲為春五百歲為秋上古
有大椿者八千歲為春以八千歲為秋

管子曰東方曰歲星其時曰春其氣曰風風生木南方

曰日其時曰夏其氣曰陽陽生火西方曰辰其時曰秋其氣曰陰陰生金北方曰月其時曰冬其氣曰寒寒生水

又曰秋三月以庚辛之日發五政一政曰禁博塞二政曰無見五兵之刃三政曰慎旅農趣聚收四政曰補缺塞圻五政曰修垣牆周門閭五政狗時五穀皆入

又曰歲有四秋春農事既畢農夫賦耜鐵此謂春之秋夏至蠶繅之所作此謂夏之秋秋成五穀之所會此謂秋之秋冬營室中女事紡績之所作此謂冬之秋

文子曰日月欲明浮雲蓋之藜蘭欲茂秋風敗之

又政失於秋太白出入無常

文子曰因春而生因秋而殺所生不德所殺不怨即幾

於道矣

春秋無心生殺有時人主無為賞罰以當遠違其理近合其道

又唯神化為貴精至為精神之所動若春風之生秋氣

之殺

其生也暄然如春物得其生死也肅然如秋物終於死故生祈其報死無所怨生之死之以其無心

也

幽求子曰南海之中秋風晨厲則慘然多悽

抱朴子曰南海之中蕭丘之上有自生火火常以秋起而秋滅

鄒子曰秋取柞櫛之火

淮南子曰春氣發而百草生得秋而萬物成實

又春女悲秋士哀知物化矣

又至秋三月青女乃出降霜雪

青女乃天神青霄玉女主雪霜

又太陰治秋則欲脩備繕兵

陰德斷割故修兵也

又孟秋之月西宮御女白色衣白采撞白鐘其兵鉞其畜

狗八月官尉其樹柘九月官候其樹槐

又秋為矩者所以方物也

又九月失政三月春風秋不濟

濟止也

又時則曰六合孟春與孟秋為合仲春與仲秋為合季春與季秋為合孟夏與孟冬為合仲夏與仲冬為合季

夏與季冬為合孟春始盈孟秋始縮仲春始出仲秋始

內出二月播植也
內八月收斂也

季春大出季秋大內孟夏始緩孟冬

始急

緩四月陽炎
急十月寒肅

仲夏至修仲冬至短

夏至北極
冬至南極

季夏

德畢季冬刑畢

德畢陽施窮也
刑畢陰殺盡也

又西方金也其帝少昊其佐蓐收執矩而至秋其神為

太白

又西方之極自崑崙絕流沙沉羽西至三危之國

流沙蓋在

崑崙之西南也

石城金室飲食之民不死之野少昊蓐收之所

司者萬二千里其令曰審用法誅必辜備賊禁姦邪飭

羣牧謹積聚修城郭補決竇塞蹊徑遏溝瀆止水壅谿

谷守門閭陳兵甲選百官誅不法

應金
斷也

鷓冠子曰斗柄西指天下皆秋

尸子曰秋為禮西方為秋秋肅也萬物莫不肅敬禮之至也

商子曰螟蛉春生秋死出而民失食今一民耕而百人食為螟蛉也大矣

呂氏春秋曰秋早寒冬必暖春多雨夏必旱

太玄經曰酉西方也秋也物皆成象而就也有形則復

於無形故曰冥也

謂物終藏

欽定四庫全書

太平御覽
卷一百一十九

太平御覽卷二十四

欽定四庫全書

太平御覽卷二十五

宋 李昉等 撰

時序部十

秋下

立秋

秋分

秋下

蔡邕月令章句曰仲秋白露節盲風至秦人謂蓼風爲

盲風

崔寔政論曰秋風厲而賞武臣

顏氏家訓曰或問何故名治獄參軍為長流乎答曰帝王代紀云帝少昊崩其神降於長流之山事出山海經於紀主秋按周禮秋官司寇主刑罰長流之職也漢魏捕賊掾耳晉宋已來始為參軍上屬司寇故取秋帝所屬為嘉名焉

夏小正曰八月丹鳥羞白鳥

羞進也
鳥蚊蚋

白辰則伏

辰房
星

駕

為鼠九月內火

火大火
心星也

漢舊儀曰八月飲酎畢夕牲以繡衣之皇帝暮視牲以陰燧取水于月以陽燧取火于日為明水火左袒以水沃牛右肩手執鸞刀以切牛毛血薦之而即更衣

李彫四部曰弔鳥山俗傳曰鳳死其上每至七月九日晦望羣鳥常來集其上嗚呼也

應劭風俗通曰周太常以八月輜軒使采異俗方言藏之祕府

劉歆鍾律書曰春宮秋律百卉必彫秋宮春律萬物必
榮

魏丁儀刑禮論曰上天垂象聖人則之歲先春而後秋
官之為理先禮而後刑

論衡曰秋氣擊殺百草谷草不任彫傷而死此言天時
夫物以春生夏榮秋而熟老適自枯死陰氣適盛與之
會遇何以驗之物有秋不死者生性未極也

陸機要覽曰秋樹名成秋雨名愁

地鏡經曰八月中草木獨有枝葉下垂者必有美玉又云八月後草木死者亦有玉

梁元帝纂要曰秋曰白藏

氣白而收藏萬物

亦曰收成

萬物成而收歛

亦曰三秋九秋素秋商秋高秋天旻天

旻愍也愍萬物之彫

風曰

商風素風淒風高風涼風激風悲風景曰朗景澄景清

景時曰淒辰霜辰

霜辰可施九月節

曰素節商節草曰衰草木

曰踈木竹曰霜柯霜筠七月孟秋亦曰初秋首秋上秋

肇秋蘭秋八月仲秋亦曰仲商九月季秋亦曰暮秋末

商季商杪秋亦曰授衣

此時婦功畢始授衣

盧公範饋餉儀曰凡八月旦上承露盤赤松子承栢上

露爲囊以膏面皮古人用點炙枝以梨枝爲之及銀盞

中者朱砂銀枝子也

盧公範者盧懷慎之家法也

臨海異物志曰黃雀常以八月入海化爲魚

博物志曰舊說天河與河海通近世有人居海渚者年

年至八月浮槎來往返不失期其人乃至槎上粇糧食

乘槎而去至天河見牽牛飲牛渚

世說曰張季鷹辟齊王東曹掾在洛見秋風起回思吳中蓴菜羹鱸魚膾曰人生貴適志耳何能從宦數千里以要名爵遂命駕便歸俄而齊王敗人皆謂見幾而作又王子敬云從山陰道上行山川自相映發使人應接不暇若值秋冬之時尤難為懷

陰陽五行歷曰一時為三月一月為一秋三月為三秋又一日為三秋故三月有九秋之名也

明堂之制曰秋至以矩矩之為度也肅而不勃剛而不

匱取而無怨內而無害威厲而不懾令行而不廢殺伐
既得仇敵乃克矩正不失百職乃服

乙巳占曰太白主秋人君當秋之時太白以施政則吉
逆則凶秋時行冬令則辰星之氣干於太白黑色而有
芒角陰氣太勝戎兵乃來風災數起國多盜賊邊境不
寧而地震圻國有大喪重獄秋時行春令歲星之氣干
於太白青色昧小則國旱君有大憂陽氣陵遲五穀不
實秋雨不降草木非時生榮矣秋時行夏令則熒惑之

氣干於太白赤色而怒國多火寒熱不節人多瘧疾蟄蟲不藏矣

大衍星分圖曰八月酉日月會于壽星

天文錄曰胃昴趙之分野自胃七度止畢十二度於辰在酉大梁之疆也八月之時白露始降萬物堅成而疆大故曰大梁

漢李陵與蘇武書曰窮秋九月塞外草衰夜不能寐側耳遠聽胡笳互動牧馬悲鳴吟嘯成羣邊聲四起晨坐

聽之不覺淚下

楚辭曰嫋嫋兮秋風洞庭波兮木葉下

言秋風疾則草木搖湖水波而

樹葉落矣

又悲哉秋之爲氣也蕭瑟兮草木搖落而變衰僚慄兮若在遠行登山臨水兮送將歸沈寥兮天高而氣清寂寥兮收潦而水清惜悽增欷兮薄寒之中人愴怳曠浪兮去故而就新坎壈兮貧士失職而志不平廓落兮羈旅而無友生惆悵兮而私自憐燕翩翩其辭歸兮蟬寂

冥而無聲鴈唳唳而南遊鷓鴣啁啾

上章流下陟轄切鳥鳴聲也

而

悲鳴獨申旦而不寢兮哀蟋蟀之宵征

又皇天平分四時兮竊獨悲此凜秋白露既下降百草
兮奄離披此梧楸去白日之昭昭兮襲長夜之悠悠兮
魏曹植秋思賦曰四節更王兮秋氣悲遙思惝恍兮若
有遺雲高氣靜兮露凝衣野草變色莖葉稀鳴蜩抱木
鴈南飛西風悽悽即計切朝夕臻扇箴屏棄締綌捐
晉潘岳秋興賦曰嗟秋月之可哀兮良無愁而不盡野

有歸燕隰有翔隼遊氛朝興槁葉夕殞於時乃屏輕箑

釋纖絺藉莞弱御袂衣庭樹槭

所責切

以洒落勁風戾而

吹幃蟬嘒嘒以寒吟兮雁離離而南飛天晃朗而彌高

日悠揚而浸微何微陽之短晷覺良夜之方永月朧朧

以含光兮露淒清以凝冷熠燿

熠燿螢也

燿於階闈兮蟋蟀

鳴于軒屏聽離鴻之晨吟兮望流火之餘景

王粲期懷秋賦曰哀時來之慘淒悼秋風之可悲

古樂府歌詩曰秋風蕭蕭愁殺人出亦愁入亦愁胡地

多颶風樹木何修修離家日趨遠衣帶日趨緩心思不能言腸中車輪轉

魏應璩雜詩曰秋日苦促短遙夜邈綿綿貧士感此時慷慨不能眠

晉陸機為顧彥先作詩曰肅肅素秋節湛湛濃露凝太陽夙夜降少陰忽東升

又悼亡詩曰皦皦隳中月照我室南端清商應秋至溽暑隨節闌慄慄涼氣升始覺夏衾單

晉張載詩曰靈象運天機日月如激電秋風兼夜戒微
霜淒舊院嘉禾殞蘭圃芳草悴芝畹嚶嚶南翔鴈翩翩
辭歸燕玉肌隨爪素噓氣應口見歛襟思輕衣出入忘
華扇觀物識時移顧已知節變

晉孫綽詩曰蕭瑟仲秋月飈戾風雲高山居感時變遠
詠興長謠跡林積涼氣虛岫結凝霄零露洒庭林密葉
辭榮條撫茵悲先落攀松羨後彫

宋劉鑠詩曰昊天清且高秋風發初涼白露下微津明

月流素光凝烟泛城闕淒風入軒房朱葉先零落綠草
就芸黃織羅還笥篋輕紈改衣裳

宋江道詩曰祝融解炎轡蓐收起涼駕長林悲素秋茂
草思朱夏鳴鴈肅雲嶺蟋蟀吟深榭寒蟬向夕號驚飈激
中夜感物憎人懷悽然無忻暇

宋謝惠連懷秋詩曰如何乘苦心矧復值秋晏皎皎天
月明奕奕河宿爛蕭瑟含風蟬嘹唳度雲鴈寒商動清
閨孤燈暖幽幔

又擣衣詩曰衡紀無淹度晷運倏如催白露滋園菊秋
風落庭槐肅肅莎雞羽烈烈寒螿啼夕陰結暮空霄月
皓中閨美人式常服端飾相招攜簪玉出北房鳴金步
南階簷高砧響發楹長杵聲哀

宋湯惠休白紵舞歌詩曰秋風嫋嫋入曲房羅帳含月
思心傷蟋蟀夜鳴斷人腸長夜思君心飛揚他人相思
君相忘錦衾瑤席爲誰芳

又八變歌曰北風秋初至吹我章華臺浮雲多暮色似

從崦嵫來

宋鮑照答湯惠休曰枯桑葉易零疲客心易驚今茲亦
何早已聞絡緯鳴回風滅且起卷蓬息復征愴愴簞上
寒淒淒帳裏清物色延暮思霜露逼朝榮百物方蕭瑟
長嘆從此興

又和王護軍秋夕詩曰散滿秋雲遠蕭蕭霜月寒驚風
西北起孤鴈夜往還金氣方勁殺陽氣微且殫泉涸甘
井竭節後芳草殘

何瑾悲秋夜曰欣莫欣兮春日悲莫悲兮秋夜

立秋

易說曰坤西南也主立秋

京房易占曰立秋坤土王涼風用事

易通卦驗曰立秋日涼風至白露下

春秋考異郵曰立秋促織鳴女工急促之

春秋元命苞曰瑤光星散爲鷹立秋之日鷹鷗擊

三禮義宗曰七月立秋秋之言湫

言湫
聚也

縮之意陰意出

地始殺萬物故以秋爲節名

五經要義曰磬立秋之樂也

白虎通曰磬者夷則之氣象萬物之成

月令占候圖曰立秋坤卦用事其神攝提二宮荊州分也
也晡時申西南涼風至黃雲如羣羊宜粟穀若晴朗風雲不至萬物不成望西南坤上有黃雲氣是正氣立秋應節萬物皆榮豆穀熟赤氣出其右萬物半死豆穀半收地動人民不安坤氣衰萬物不成地頻動牛馬病應

在十二月坤氣見于江湖江湖水必竭坤氣退則地裂
泉湧申時西南有赤黃氣或白潤厚白澤者粟大熟

又立秋日午時豎竿影得四尺五寸二分半五穀熟立
秋後四十五日內土氣在坤不得修造動土及遠行出
軍事凶

漢書曰孫寶爲京兆尹請侯文爲掾進見如賓禮數月
以立秋日署文東部督郵且曰今鷹隼始擊當順天地
取姦惡以成嚴霜之誅掾部詎有其人乎文曰無其人

不敢受職寶曰誰也文曰霸陵杜穉季寶問其次文曰豺狼橫道不宜復問狐狸

後漢書曰申屠建等與御史大夫隗囂合以立秋日

樓時共劫更始

漢書音義曰獬獸也以立秋日祭獸王

獵社又獬音丑于反樓音萎

續漢書曰立秋之日夜漏未盡五刻京都百官皆衣白

純皂領緣中衣迎氣于西郊

又立秋之日西郊畢始揚威武斬牲于郊東門以薦陵

廟其儀乘輿御戎輅白馬朱鬣躬執弩射牲牲以鹿麋
太宰令謁者各一人載獲車送陵廟還宮遣使者賚束
帛以賜武官肄兵習戰陣之儀斬牲之禮名曰驅劉如
淳曰樓漢儀注立秋驅婁許慎曰俗以二月祭飲食糞
州北部或以八月作飲食爲婁也

祠令曰立秋祀白帝于西郊帝少昊配蓐收從祠

又立秋後辰祀靈星于國城東南

登真隱訣曰立秋之日日中五岳諸真人諸黃老于黃

房雪庭山會仙官于日中定天下神圖靈圖藥圖

符瑞圖曰立秋西方閭闔風至

一名颶風

白虎通曰立秋之日涼風至王者報地德禮西郊

周書時訓曰立秋之日涼風至又五日白露降又五日
寒蟬鳴涼風不至國無嚴政白露不降民多疾病寒蟬
不鳴人臣力爭白露之日鴻雁來又五日玄鳥歸又五
日羣鳥養羞鴻雁不來遠人背叛玄鳥不歸室家離散
羣鳥不羞臣下驕慢秋分之日雷始收聲又五日蟄蟲

坯戶又五日水始涸雷不收聲諸侯淫汰蟄蟲不坯戶
民靡有賴水不始涸介蟲爲害

五行休王論曰立秋坤元兌相乾胎坎沒艮死震困巽
廢離休

陸機要覽曰列子御風常以立春歸乎八荒立秋遊乎
風穴是風至草木皆生否則搖落謂之離合風

秋分

說文曰龍春分而登天秋分而入淵

易說曰秋分閭闔風至雷始收聲鷙鳥擊玄鳥歸

又兗西方也主秋分

孝經說曰斗指酉爲秋分又曰秋分日在內衡

文子曰陰陽調日夜分故萬物春分而生秋分而成生
與成必得和之精故積陰不生積陽不化陰陽變化乃

能成此天地之氣和平故
和此天地之氣和平故
萬物得生成故也

京房易候曰虹八月出西方粟貴

又京房易候占曰秋分而人君釋鐘鼓之懸

孔安國尚書注曰國虛玄武之中星皆以秋分日見以
正三秋

天文錄曰仲秋秋分暮出角亢氐房東四舍爲漢中

周書時訓曰秋分八月雷乃收聲不收聲即人民不安

又云諸
候驕逸

蟄蟲坯戶不坯戶即邊方不寧

又云人
靡有賴

水始涸

水不始涸即人多疾病

又云介
蟲爲害

歷日疏曰秋分八月之中氣也秋分之時日出于卯入
于酉分天之中陰陽氣等晝五十刻夜五十刻一晝一

夜二氣也中分故謂之秋分也

太平御覽卷二十五

欽定四庫全書

太平御覽卷二十六

宋 李昉等 撰

時序部十一

冬上

冬上

釋名曰冬曰上天其氣上騰與地絕也故月令曰天氣上騰地氣下降

說文曰冬四時盡也字從夂

古終字

從夂

古水字

書曰申命和叔宅朔方曰幽都平在朔易曰短星昴以正仲冬厥民隩鳥獸氄毛

又曰冬祁寒小民亦惟曰怨咨

詩曰我有旨蓄亦以禦冬

又曰豐年之冬必有積雪

又曰十月納禾稼黍稷種陸

上音童下音陸

禾麻菽麥

又曰二之日鑿冰沖沖

又曰冬日烈烈飄風發發

又曰坎其擊鼓宛丘之下無冬無夏植其鷺羽坎其擊
缶宛丘之道無冬無夏植其鷺翮

禮月令曰十月之節日在房

立冬為十月節

昏虛中曉張中斗

建亥位之初其日壬癸

壬癸屬水主冬

其帝顓頊其神玄冥

昔顓

頊氏以水繼天而王故為冬帝水正

其蟲介

北方玄武介蟲之長

凡有甲之類皆屬於水故曰其蟲介介甲也

其音羽

三分音去一以生羽數四十八屬水以為最清

物之象也冬炁和則羽聲調樂記曰羽亂則危其財墮也

律中應鍾

十月氣至則應鍾之律應應鍾

者姑洗之所生三分其味鹹其臭朽臭味鹹朽皆屬於水其祀行

去一管長四寸七分

祭先腎冬陰氣充塞於外祀之於行從辟除之類行謂道也祭先腎者謂陰在下腎亦在下凡祀之組

先進立冬之月水始冰後五日地始凍後五日野雉入

大水爲蜃食黍與鴈冬味之宜其器閔以菴太史以先立冬

三日謁于天子曰某日立冬盛德在水天子乃迎冬北

郊迎冬為祀黑帝叶光紀於北郊以顯項配佐以玄冥星三辰七宿從祀可以築城郭造

宮室穿竇窖修囿倉謂改築城郭創造宮室修囿倉以備積貯天子始裘謂初

衣寒

又曰十月中氣日在尾小雪十月中氣昏危中曉翼中斗建亥

位之中小雪之中虹藏不見後五日天氣上騰地氣下

降後五日閉塞而成冬謹闕梁塞蹊徑蹊徑謂山澤禽獸道

又曰十一月之節日在箕大雪為十一月之節昏營室中曉軫中

斗建子位之初律中黃鍾十一月氣至則黃鍾之律應黃鍾者律之始也管長九寸

其日其音其數並同孟冬大雪之日鶡旦不鳴後五日虎始交後五

日荔挺出

又曰十一月中氣日在南斗冬至為十一月中之氣昏東壁中曉角

中斗建子位之中冬至之日蚯蚓結後五日麀角解後

五日水泉動是月也祀昊天上帝於圜丘命有司祭馬

步

謂仲冬祭馬步於大澤用剛日

伐木取竹箭

此時堅成可伐取

又曰十二月之節日在南斗小寒為十二月之節昏奎中曉亢中

斗建丑位之初律中大呂

十二月氣至則大呂之律應大呂者蕤賓之生三分益一

管長八寸四分其日其音其數並同益冬小寒之日鴈北鄉後五日鵲始巢

後五日野雉始雉天子乃命將帥講武習射角力講武角力

校武士材力所以備畋獵之禮也天子乃厲飾執弓挾矢以獵厲飾謂衣戎服

尚威武
以獵
修祭禽之禮
謂所獵得禽獸以供蜡祭

又曰十二月中氣日在婺女

大寒為十月中氣

昏婁中曉氏中

斗建丑位之中大寒之日雞始乳後五日征鳥厲疾後

五日水澤腹堅天子親往嘗魚

時魚潔美

冰方勝取而藏之

春秋傳曰月在北陸而藏冰

計耦耕修耒耜

寒氣過農事將興

出土牛以示

農耕之早晚

若立春在十二月望則策牛人近前示其農早也立春在十二月晦及正月朔則策

牛人當中示其農中也立春近正月朔則策牛人近後示其農晚也

天子乃與公卿大夫

共飭國典論時令以待來歲之宜

周官建寅之月懸法於象魏以示人四時

之令皆以此為準故以建丑之月與公卿先飭之

命有司大儺旁磔以送寒氣

大儺為歲終逐除陰疫以送寒氣故周官命方相氏率百隸索室驅疫以逐之旁磔犬於門春磔九門冬禮

大故徧磔於十二門明扶陽抑陰之義犬屬金冬金盡春興春為木故殺金以助木氣也

又曰季冬之月命告民出五種命農計耦耕修耒耜具田器

又曰是月也日窮於次月窮於紀星回于天數將幾終

歲且更始專其農人無有所使

又曰孟冬之月天子乃祈來年于天宗注云天宗日月

星辰也

又曰孟冬命有司循行積聚無有不歛坯城郭戒門閭
又曰夫爲人子之禮冬溫夏清

又曰冬之爲言中也中者藏也

又曰國子春夏教詩書秋冬學羽籥

又曰儒有居處齊莊坐起恭敬言必誠信行必篤敬道
途不爭險易之利冬夏不爭陰陽之和

又曰昔者先王之未有宮室冬則居營窟夏則居橧巢
大戴禮曰季冬聽獄論刑者所以正法

又曰方冬三月草木落庶虞藏五穀必入于倉於時有事燕于皇祖考息國老六人以成冬事

又曰司空司冬以制度制地事准撥山林規表行次畜水行表灌浸以節四時之事理地遠近以任民力以節民食

又曰古者天子常以季冬考德以觀治亂德盛者治也德不盛者亂也德盛者得之也德不盛者失之也

周禮曰小司寇孟冬祀司民獻民數於王王拜受之以

圖國用而進退之

司民星謂軒轅角也

又曰凌人掌冰正歲十有二月令斬冰三其凌

正歲季冬火星

中大寒寒冰方盛之時春秋傳曰火星中而寒暑退凌冰室也三者之為消釋度也三其凌三倍其冰

又曰占夢職季冬聘王夢獻吉夢於王王拜而受之

聘問

也夢者事之祥凶吉之占在日月星辰季冬日窮於次月窮於紀星迴於天數將幾終於是發契而問焉若休度之云耳因獻羣臣之吉夢於王歸美焉詩云牧人乃夢衆維魚矣兆維旗矣此所獻吉夢

又曰天府掌季冬陳玉以貞來歲之嫩惡鄭玄注曰問事之正曰貞問歲嫩惡謂問於龜

又曰大呂丑之氣十二月建丑而辰在亥枵

又曰冬官其屬六十掌邦事

又曰以玉作六器以禮天地四方以玄璜禮北方

注曰禮北

方謂黑精之帝顓頊玄冥配食焉半璧曰璜象冬閉藏地上無物惟天半見

又曰冬見曰遇

遇者偶也義取不期而偶至大行人云冬遇以惕諸侯之慮

傳曰公父定叔出奔衛三年而復曰不可使共叔無後使以十月八日良月也就盈數焉

傳曰鄴舒問於賈季曰趙衰趙盾孰賢對曰趙衰冬月

之日趙盾夏月之日冬日可愛
夏日可畏

爾雅曰冬爲上天

言時無事在上臨下
孫炎曰冬天藏物物伏於下天清於上

又曰冬爲玄英

炁黑而清英

又曰冬爲安寧

四時之別名尸子以爲太平祥風名

又曰冬獵爲狩

狩守也冬物畢成圍守取無簡擇

易通卦驗曰大雪魚負水鄭玄曰魚上近水也

易統圖曰日東行北方黑道曰北陸

京房易曰冬至坎王廣莫風用事人君決大刑斷獄訟

繕宮殿

尚書大傳曰殷以季冬為正月

又曰周以仲冬為正月

又曰北方伏方也伏方也者萬物伏藏之方伏藏之方則何以謂之冬冬者中也中也者萬物藏於中也故曰北方冬也陽勝則吁茶萬物而養之外也陰盛則呼吸萬物而藏之內也

吁茶氣出即溫呼吸氣入則寒溫則生寒則殺也

故曰呼吸

也者陰陽之交接萬物之始終

尚書大傳曰冬者昴昏中可以收歛蓋藏田獵斷伐當告乎天子而天子賦之民故天子南面而視四星之中知民之緩急急則不賦籍不舉力役籍公家之常徭故曰敬授民時此之謂也

又曰平在朔易日短朔始也

傳曰天子以冬命三公謹蓋藏閉門閭固封境入山澤田獵以順天道以佐冬固職也

詩含神霧曰魏地處季冬之位土地平夷

又曰唐地處孟冬之位得常山太岳之風音中羽其地

硠确

上苦交切
下苦割切

而收故其民儉而好畜此唐堯之所起

三禮義宗曰冬日壬癸者壬任也癸揆也言萬物更任
生於黃泉皆有法度也

又曰十二月小寒為節者亦形於大寒故謂之小言時
寒氣猶未是極也大寒為中者上形於小故謂之大十
一月一陽爻初起至此始徹陰氣出地方盡寒氣併在
上寒氣之逆極故謂大寒也

逸禮曰冬則衣黑衣佩玄玉乘玄輅駕鐵驪載玄旗以迎冬于北郊其祭先豕居明堂後廟啓北戶

春秋繁露曰冬氣衰故藏

又曰木有變春凋冬榮此徭役衆賦歛重也

春秋考異郵曰冬風曰廣莫風

春秋感精符曰天統十二月建子天始施之端也謂之天統者周以為正漢書記律黃鐘為天統

史記曰漢高祖既定天下叔孫通定朝儀羣臣朝十月

儀於長樂宮執戟尊卑次序諸侯王已下莫不震恐帝曰吾乃今日知為皇帝之貴也

前漢書曰魏相書曰北方之神顓頊乘坎執權司冬

張晏

曰水為智智謀重故為權

東方朔上書云臣朔年十三讀書三冬文史足用

又曰冬民既入婦人同巷相從夜績女工一月得四十五日必相從者所以省費燎火同巧拙而合習俗也

龔遂為渤海太守勸民冬益收果實菱芡民皆賴之焉

續漢書曰嚴延年字次卿爲河南太守冬月傳屬縣囚會府下流血數里河南號爲屠伯

又曰宋均爲九江守五日一聽事冬以日中夏以平旦後漢律歷志曰日行北陸謂之冬

又曰季冬之月星回歲終陰陽以交勞農大享臘先臘

一日讎謂之逐疫

漢舊儀曰顓頊氏有三子生而亡去爲疫鬼一居江水是爲虎一居若水

是爲罔兩城鬼一居人宮室區隅漚庾善驚人小兒月令章句曰日行北方之宿北方太陰恐爲所抑故命有司大讎所以扶陽抑陰也盧植禮記注曰所以逐衰而迎新

又曰是月也立土牛六頭於國都郡縣城外丑地送大

寒

月令章句曰是月之昏建丑丑為牛寒將極故出其物類形象以示送達之且以示升陽也

後漢書曰鍾離意辟大司徒侯霸掾詔令部送徒詣河
內時冬寒徒病不能行路過弘農輒移屬縣使作徒衣
縣不得已與之上書白狀意亦具以聞光武得奏以示
霸曰君所使掾何乃仁於用心誠良吏也

又曰汝南舊俗十月饗會百里內縣皆費牛酒到府讌
飲

又曰段熲對桓帝討先零東羌術畧曰三冬兩夏足
成之

又曰黃香舉孝廉為郡五官貧無奴僕香身執勞苦冬無
袴而親調滋味

魏畧曰顏裴字文林為京兆尹課民當輸租致薪兩束
為冬寒冰炙筆硯風化大行

又曰賈逵世為著姓少孤家貧冬常無袴

又曰吉茂字叔暢從少至長冬則披裘夏則短褐臣役

妻子室如懸磬

又曰邠原就師學一冬講孝經論語自在齟齬有異及長金玉其行

又曰董遇好學人從學遇不好教曰當先讀書百遍其義自見從者云苦難得暇日遇曰當以三餘冬歲之餘夜日之餘雨時之餘

吳志曰左臺御史孟宗有孝道母性嗜筍及母亡冬節至宗入林哀泣而筍生得以供祭祀

晉書曰王敦憚周顛每見輒面熱雖冬月扇面不休

又曰吳隱之冬月無被常蓋衣披絮勤苦同於貧庶

隱之

時為
牧守

又曰公孫鳳字子鸞隱昌黎九成山冬夏草布寢處山
林彈琴吟咏陶然自得

又曰劉殷母王氏盛冬思董而不言食不飽者一旬矣
殷怪而問之母言其故殷時年九歲乃於澤中慟哭聲
不絕者半日於是忽然有人云止聲殷收淚視地便有

董生焉因得斛餘而歸

宋書曰朱百年與孔覲友善百年家室素貧母以冬月
亡衣並無絮自此不衣綿帛嘗寒時就覲宿衣悉袂布
飲酒眠覲以卧具覆之百年不覺也既覺引卧具去體
謂覲曰綿定竒温因流涕悲痛覲亦為之傷感也

齊書曰沈瑀為揚州從事湖屬縣方山埭高峻冬月公
私行旅以為難明帝使瑀循行乃開四港斷行客就作
三日便辦

又曰孝子王虛之庭中楊梅樹隆冬三實又每夜所居
白光如燭墓左柰樹一冬再實時人咸以為孝感所致
梁書曰安成王秀為郢州刺史務行德義每冬月常作袴
襦以賜貧凍者

又曰任昉素清貧卒後其子西華冬月著葛帔練裙道逢
平原劉孝標泣然矜之謂曰我當為卿作計乃著廣絕
交論以譏其舊交也

吳越春秋曰越王念復吳怨非一旦也苦身勞心夜以

接日目卧則攻之以蓼足寒則漬之以水冬常抱冰

韓詩外傳曰冬不浴非惡水情有餒也

穆天子傳曰季冬甲戌天子冬遊飲于留祁射于麗虎

讀書于勑丘

若舉必書也勑音犁

西王母獻酒于天子天子遺其

靈鼓乃化為黃蛇

周禮曰靈鼓四面洪範以為鼓妖

嵇康高士傳曰善卷古之賢人也舜以天下讓之善卷

曰予立宇宙之中冬則衣皮毛夏則衣絺葛何以天下

為哉

汝南先賢傳曰周舉為并州刺史太原一郡舊俗以介子推焚骨有龍忌之禁至其亡月咸言神靈不樂舉火由是土人每至冬中輒一月寒食莫敢烟爨老少不堪歲多死者舉既到乃作弔書以置子推之廟言盛冬止火殘損人命非賢者之意以宣示愚民使還溫食於是衆惑稍解風俗頗革

烈士傳曰孟嘗君食客三千人齊市有乞食馮諼至冬無袴而有饑色

皇甫謐高士傳曰焦先字孝然冬夏不著衣卧不設席
禰衡別傳曰十月朝黃祖於艨衝舟上曾設黍臠衡年
少在坐黍臠至先自飽食畢搏弄戲擲其輕慢如此

列仙傳曰丁次都不知何許人為遼東丁氏傭嘗為丁
氏置葵問曰冬何有葵云從日南買來

神仙傳曰王仲都漢中人少修道術元帝時常以隆冬
單衣載駟馬車於上林昆明池環冰而馳御者狐裘猶
寒振欲死而都無變色背上蒸氣休休然


休休氣
威貌

師覺孝子傳曰王祥少有德行早失母後母憎而譖之祥孝彌謹感寒河水堅冰網罟不施母偶欲生魚祥解褐扣冰求之忽冰少開有雙魚出游祥垂綸而獲之時人謂之至孝所致也

宗躬孝子傳曰何子平事母至孝母喪年六十有終身之慕夏避清涼冬不衣絮

盛弘之荊州記曰宜都銀山有風穴大數尺名風井夏則風出冬則風入樵人有冬過者置笠穴口風吸之經

日還長陽溪而得笠



太平御覽卷二十六

欽定四庫全書

子部

太平御覽卷

二十七至
三十

詳校官侍讀學士臣沈咸熙

員外郎臣牛稔文覆勘

總校官降調編修臣倉聖脈

校對官中書臣袁文邵

謄錄監生臣劉國永

欽書四庫全書

太平御覽卷二十七

宋 李昉等 撰

時序部十二

冬下

冬下

呂氏春秋曰冬之德寒寒不信其地不成剛地不成剛則凍閉不開天地四時猶不能以不信成物又况人乎

周書時訓曰小寒十二月節鴈北鄉鴈不北鄉即臣不

懷忠鵲始巢鵲不巢即邊方不寧

又曰一國不寧

野雞始雉野

雞不雉即國乃大水

又云不雉來年雷乃收聲

又曰大寒十二月雞始乳雞不乳即媼婦亂男鷲鳥厲疾

鷲鳥不厲疾即國不除奸水澤腹堅不腹堅即言無所從

梁元帝纂要曰冬曰玄英亦曰安寧亦曰玄冬三冬九

冬天曰上天風曰寒風勁風嚴風厲風衰風陰風景曰

冬景寒景時曰寒辰節曰玄節鳥曰寒鳥寒禽草曰寒

卉黃草木曰寒木寒柯素木寒條

又曰十月孟冬亦曰上冬亦曰陽月

此時純陰用事爓其無陽故曰陽月

十二月季冬亦曰暮冬杪冬餘月暮節暮歲

風俗通曰夏宮冬律雨雹必降冬宮夏律雷必發聲夫音樂至重所感者天故曰知禮樂之情者能作識禮樂之文者能述

又曰趙仲讓為梁冀從事中郎冬月坐庭中向日解衣捕虱

白虎通曰十月律謂之應鍾何鍾者動也言萬物應陽

而動下藏也

論衡曰陽氣動於下而陰氣應之也

又曰十二月律謂之大呂何大者太也呂者拒也言陽

氣欲出陰不許也呂之言拒者旅抑拒難之也

太玄經曰罔北方也冬也未有形也

罔無也未有形故為罔也言冬萬物

深藏黃泉也

莊子曰魯遽弟子曰我得夫子之道吾能冬爨鼎而夏造冰矣魯遽曰是直以陽召陰非吾所謂道也

又曰古者民不知衣服夏多積薪冬則煬之故命之曰知生之民

又曰宋人有善為不龜手之藥者世世以泝泝統為事吳人有百金買不龜手之藥以說吳王越有難吳王使之將令與越人水戰大敗越人裂地而封能不龜手一也或以封或不免於泝泝統則所用之異也

按統古鱗字絮也泝

泝統漂吹絮於水中也泝扶經切泝音歷切

太公金匱曰夏桀之時有岑山之水桀常以十月發民

鑿山穿陵通於河民諫曰孟冬鑿山穿陵是泄天氣發地之藏天子失道後必有敗桀殺之期年岑山崩為大澤湯率諸侯伐之

文子曰冬冰可折夏條可結

又曰民有飢者食不重味民有寒者冬不被裘與民同苦樂即天下無哀民

列子曰瓠巴學琴於師襄當冬而叩徵絃以激蕤賓陽光熾烈堅冰立散

孟子子產聽鄭國之政以其乘輿濟人於溱洧孟子

曰子產惠而不知為政歲十一月徒杠音江成十二月輿

梁成民未病涉也

徒杠獨木小橋可通徒行輿梁通車橋十一月夏九月十二月夏十月

鷓冠子曰斗柄北指天下皆冬

鄧析子曰為君自當若冬日之陽夏月之陰萬物自歸
莫之使也恬卧而功自成優游而政自治豈在振目搯
腕手操鞭朴而後為治歟

管子曰冬作土功發地藏則夏多暴雨秋霖不止

鄒子曰冬取槐檀之火

尹子曰冬為信北方為冬冬終也北伏方也故萬物冬皆伏貴賤若一美惡不惑信之至也

傅子曰夏令披裘冬令披葛雖有嚴令終不肯從者逆時也

韓子曰帝堯之王天下冬月鹿裘

又曰管仲隰朋從桓公而伐孤竹春往冬返迷惑失道管仲曰老馬可用也乃放老馬而隨之遂得道行山中

無水隰朋曰蟻冬居山之陽夏居山之陰蟻壤一寸而
仞有水乃掘地遂得水

荀卿子曰天不為人惡寒而輟其冬

淮南子曰以冬鑠膠以夏造水天道無私就也無私去

也能者有餘拙者不足

言以非時鑠膠造水難成也天道無私就無私去能行道者有

餘不能者不足

又曰貧人冬則羊裘不蔽體短褐不掩形而煬竈口冬
日之陽夏日之陰萬物歸之而莫使之然

冬日人物歸
陽夏日人物

歸陰非使之然
自有如是也

又曰稷闢土墾草以為百姓力農然不能使禾冬生豈
其人事不至哉其勢不可也

又曰孟冬之月招搖指亥爨松燧火

改火也

又曰冬為權權者所以權萬物也

又曰閭闔風四十五日不周風至四十五日廣莫風至

坎卦不周風至則修宮室繕邊城

立冬節土功其始故治宮室繕修邊城備

寇難也廣莫風至則閉關梁斷刑罰

冬象閉藏不通關梁也罰刑之疑者於是

順時而
決之

又曰古之君人者其慘怛於民也凡國有飢者食不重

味民有寒者冬不披裘

蓋與同其飢寒

冬伐薪蒸

大者曰薪小者曰蒸以

為民資

資用

又曰北方水也其帝顓頊

顓頊黃帝之孫以水德王號曰高陽氏死而祀北方也

其佐玄冥執權而治冬

又曰冬行春令泄

象春氣有散發泄也

行夏令旱

早象陽失

行秋令霧

秋氣陰故霧亂

又曰太陰理秋則欲修備繕兵

金德斷剛故修兵也

太陰理冬則

欲猛毅剛強

純陽閉故水澤水故剛強

又曰北方之極有九澤窮夏晦之極北至今正之谷

九澤

北方之澤夏大也悔暝也

有凍寒積冰雪雹霜霰漂潤羣水之野

頊玄冥之所司者萬二千里

顓頊黃帝之孫也以水德王天下號為高陽氏死為

北方水德之帝其神玄冥金天氏有適子曰昧為玄冥臨死祀為主水之神也

月令曰申詳禁固閉藏修障塞繕關梁禁外徙斷刑罰守門閭大搜客止交遊夜禁樂早閉晏開以索姦人已

得報之必固天節已幾刑殺無赦雖有欽恤之心親斷

以法度毋發藏毋釋罪

應陰殺也

又曰十月失政四月草木不實

實長也

語林曰羊稚舒冬日釀酒令人抱甕須臾復易人速成而味好

說苑曰衛靈公天寒鑿池苑春諫曰天寒起役恐怠民也公曰寒乎春曰公衣狐裘坐熊席是以不寒民寒甚矣公乃罷役

世說曰石崇為客冬天獲萍蘆王愷乃密賄崇帳下都督及御車人問所以對曰萍蘆是搗韭雜以麥苗耳

殷芸小說曰晉孝武帝即位時年十三四冬天晝日不著複衣但著單衣絹裙五六重夜則累裯禱謝公曰體宜令有常陛下晝過冷夜過熱非攝養之術帝曰夜靜故也謝公歎曰上理不減先帝

崔鴻前趙錄曰王延九歲事母母冬月思生魚杖延流血延尋汾河扣凌而哭得魚而饋母

山海經曰鍾山之神名曰燭陰

燭龍也是燭九有因名云

視為晝瞑

為夜吹為冬呼為夏不飲不食不息息則為風

息氣身息也

長千里

蔡邕月令章句曰冬終也萬物於是終也

崔寔四民月令曰十月農事畢五穀既登家備儲畜乃
順時令也

祠令曰季冬藏冰仲春開冰並用黑牡秬黍祭司寒之
神於冰室其開冰加以桃弧棘矢設於神座

又曰七祀祀行以冬

漢桓譚新論曰太原民以隆冬不火食五月雖有疾病急緩猶不敢犯為介子推故也

漢崔寔政論曰僕前為五原太守土地不知緝績冬積草伏卧其中若見吏以草纏身令人酸鼻吾乃賣儲峙得二十餘萬詣鴈門廣武迎織師使巧手作機乃紡以教民織

漢書于定國飲酒至數石不亂冬月治獄請讞飲酒益

精明

後漢書虞詡祖父經為郡縣獄吏案法平正務存寬恕
每冬月上牀輒流涕隨之常稱曰東海于公高為里門
其子定國卒至丞相吾決獄六十年矣雖不及于公其
庶乎子孫何必不為九卿耶故字詡昇卿

晉皇甫謐玄晏春秋曰余家貧晝則憇於作勞夜則甘
於疲寐以三時之務卷帙生塵篋不解緘唯季冬末纔
得一句學爾

晉嵇康集序曰孫登於汲郡北山土窟中住夏則編草為裳冬則披髮自覆

論衡曰夫雲出於丘山降散則為雨矣人見從上則謂之天雨冬日天寒則雨凝為雪皆由雲氣發於丘山不從天降集於地明矣

瑞應圖曰芝草常以六月生春夏紫秋白冬黑

歷義疏曰小寒月之初氣也陰氣小極故曰小寒大寒月之中氣也言十二月巳半陰氣大極故曰大寒

三輔決錄曰孫辰字允公家貧不仕居社城中織箕為
業明詩書為郡功曹冬月無被有藁一束暮卧其中旦
收之

會稽典錄曰盛吉為廷尉每至冬月罪囚當斷其妻執
燭吉持丹筆相向垂淚

齊民要術曰孟冬之月天氣上騰地氣下降天地不通
閉塞而成冬勞農以休息之

黨正屬民飲酒
正齒位次序也

荆楚歲時記曰十二月八日沐浴轉除罪障

干寶搜神記漢代十月十五日以豚酒入靈女廟擊筑而奏上弦之曲連臂踏地歌赤鳳來乃巫俗也

皇覽塚墓記曰蚩尤塚在東郡壽張縣闕城中人常以十月朔望見有氣如匹絳自上屬下號曰蚩尤旗

獨異志曰晉武帝哭羊祜冬月涕泗交下凝鬚為冰

博物志曰宋國有田夫常衣敝緼僅以過冬暨春每日曝於日不知天下之有廣廈奧室繻繡狐貉顧謂其妻曰負日之暄人莫知者以獻吾君將有重賞

乙巳占曰人君當以冬時候辰星為政則辰星見伏以時天子當以冬時飭死事恤孤獨察阿黨謹蓋藏修積聚圯城郭戒門閭修鍵閉慎管籥固封疆備邊境完要塞謹關梁塞蹊徑飭喪紀不為淫泆命伏藏之處講武習射御角力戰省婦事則辰星順行矣人君淫泆非道縱恣不禁近習不恤刑獄起衆徵發開泄藏氣則辰星失行伏見不常而有芒角則民多疾疫隨之以喪亡國不昌也人君以冬時行春令則歲星之氣干之色青而

君憂刑獄變動生死不當地踈不容人多流亡蟲蝗為
災水泉咸竭民多疥癘胎夭多傷國多固疾斷獄官凶
以冬時行夏令則熒惑之氣干之色赤而小昧刑禍並
起兵旱薦臻國多暴風方冬不寒氣霧冥昧雷迺發聲
以冬時行秋令則太白之氣干之色白而有芒野戰並
作獄訟軍旅同時而興雪霜不時小兵時起土地侵削
四鄙入保

輦下歲時記曰此月戶部奏大閱天下貢物於都堂其

日放朝宰相與百官皆赴戶部宴飲一時特盛開元中
曾以大閱一日貢物賜李林甫九州任土盡歸人臣之
家國史書其事也

晉陸機感時賦曰悲夫冬之為氣亦何懔懔以蕭索天
悠悠其彌高霧鬱鬱而四幕夜綿邈其難終日晚晚而
易落數曾雲之歲蕤墜零露之揮霍冰冽冽而寢興風

謾謾而屢作

謾起也
所六切

陸雲歲暮賦曰淪重陽於潛戶徵積陰於司寒

袁宏北征賦曰于時天高地涸木落水凝繁霜夜灑勁
風晨興日緩緩其已頽月亭亭而虛昇

鮑照舞鶴賦曰窮陰殺節急景凋年涼沙振野箕風動
天悠悠苦霧皎皎悲泉冰塞長河雪滿羣山既而氛昏
夜歇景物澄廓星翻漢迴曉月將落感寒雞之早晨憐
霜鴈之違漠臨驚風之蕭條對流光之照灼

傅玄詩曰季冬時慘烈猛寒不可勝嚴風截人耳素雪
墜地凝林上飛霜起波水自生冰未夕結重衾崇朝不

敢興

鮑照登峴山詩曰孟冬十月交殺盛陰欲終風冽無勁
草寒威有凋松軍井冰晝結士馬氎夜重晨登峴山首
霜霧凝未通

王褒歲暮詩曰歲晚悲窮律他鄉念索除寂寞灰心盡
摧殘生意餘產空交道絕財殫密戚疎空悲趙壹賦還
著虞卿書

太平御覽卷二十七

欽定四庫全書

太平御覽卷二十八

宋 李昉等 撰

時序部十三

立冬

冬至

立冬

禮記月令曰孟冬之月是月也以立冬先三日太史謁於天子曰某日立冬盛德在水天子乃齋立冬之日親

率公卿大夫以迎冬於北郊還乃賞死事恤孤寡

左傳曰仲尼問鄭子曰丹鳥氏司閉者也立秋來立冬至
易通卦驗曰立冬不周風至水始冰薺麥生雀入水爲
蛤

京房易占曰立冬乾王不周風用事人君當興邊兵治
城郭行刑決罪

三禮義宗曰十月立冬為節者冬終也立冬之時萬物
終成為節名小雪為中者氣序轉寒雨變成雪故以小

雪為中

家語曰魚遊於水鳥遊於雲故立冬則燕雀入於海化為蛤

符瑞圖曰八風循通八方之風應時而至也立冬北方

廣莫風至

一名寒風

周書時訓曰立冬十月節水始冰水若不冰即國用匱乏地始凍地若不凍即灾咎之徵野雉化為蜃若不為蜃即時多淫婦

五行休王論云立冬乾王坎相艮胎震沒巽死離囚坤廢兌休

冬至

周易曰先王以至日閉關商旅不行后不省方

尚書曰日短星昴以正仲冬孔安國註曰日短冬至日也星昴西方白虎七宿之昴宿並見以正冬之三節也

禮記曰仲冬之月日短至陰陽爭諸生蕩

爭者陰方盛陽欲起也

君子齋戒處必掩身身欲寧去聲色禁嗜欲安形性事

欲靜以待陰陽之所定

周禮曰冬至日在牽牛景長一丈三尺夏至日在東井景長尺有五寸

又曰雜氏掌殺草春日生而萌之夏日至而夷之秋繩而芟之冬至至而耜之若欲其化也則以水火變之

謂以火燒其所掌雜之草已而水之則其土亦和美矣月令季夏乃燒雜行水利以殺草如以熱湯可以糞田疇可

以美土疆

又司徒職曰夏至日之景尺有五寸謂之地中天地之

所合也四時之所交也風雨之所會也陰陽之所和也然則萬物阜安乃建王國為制其畿方千里而封樹也春秋左傳曰僖公五年春正月辛亥朔日南至公既視朔遂登觀臺以望而書禮也凡分至啓閉必書雲物為備故也

易通卦驗曰冬至之日見雲送迎從下嚮來歲大美人和不疾疫無雲送迎德薄歲惡故其雲赤者旱黑者水白者為兵黃者有土功諸從日氣送迎其徵也

又冬至始人主致八能之士或調黃鍾或調六律或調五行或調律歷或調陰陽或調正德鄭玄註曰致八能之士者言選於人衆之中取習曉者使之調為諧調和之意也

又冬至始人主與羣臣左右從樂五日天下之衆亦家從樂五日以迎日至之禮鄭玄註曰從者就也冬至君臣俱就大司樂之宮臨其肆樂祭天圜丘之樂以為祭事莫大於此

又冬至成天文鄭玄註云天文謂之三光運照行天下
冬至而數訖於是時也祭而成之所以報也

又冬至之日立八神樹八尺表日中視其晷如度者則
歲人和順晷不如度者歲惡晷入則水退則旱進二寸
則月食進尺則日食進謂長於度也

漢書曰宦者淳于陵渠復覆太初厯晦朔弦望皆最密

日月如合璧五星如連珠

孟康曰謂太初上元甲子夜
半朔旦冬至時七曜皆會聚

斗牽牛分度夜盡如合璧連珠
也師古曰言其應候不差也

又冬至陽氣起君道長故賀夏至陰氣起君道消故不
賀

司馬彪續漢書曰天子常以冬至夏至日御前殿合八能
之士陳八音聽樂均度晷景候鍾律權土炭効陰陽也
續漢書禮儀志曰冬至前後君子安身靜體百官絕事
不聽政擇吉辰而後省事聽事之日百官皆衣絳

後漢書曰傅賢字仲舒遷廷尉每冬至斷獄遲迴流涕
魏志曰黃初元年冬至日黃雀集于文昌殿前

後魏崔浩女儀曰近古婦人常以冬至日上履襪於舅
姑踐長至之義也

西域諸國志曰天竺國以十月二十六日為冬至冬至
則麥秀

管子曰以冬至之日始數四十六日冬盡春始教民鑽燧
謹竈泄所以壽人也

淮南子曰冬至之日北宮御女黑色衣黑采擊磬石水王

北方故處北宮其器鍛其畜羸鍛者却內像陰閉羸水畜

又陽氣為火陰氣為水水勝故夏至濕火勝故冬至燥

燥故炭輕
濕故炭重

又曰冬至井水盛盆水溢鵲始巢八尺之臬日中而景三尺
呂氏春秋曰冬至後五旬七日菖蒲生百草之先生者
於是始耕高誘註曰菖蒲水草也

又冬至日行遠道周四極命之曰玄明天

又仲冬命之曰陽月

陽氣在上人民空閒
無所事故作曰陽月

太玄經曰冬至及夜半以後者近玄之象也進而未及

往而未至虛而未滿故謂之近玄也

玄以子午為晝夜分冬至夜半以前

癸亥之日也玄道好謙夜半以後天變雖進未及雖往未至猶在中虛而未盈滿也是為近玄則休也釋文曰

冬至斗指子夜半時加午者也

又調律者度竹為管蘆葦為灰列之九閉之中漠然無動寂然無聲微風不起纖塵不形冬至夜半黃鍾以應白虎通曰冬至廣莫風至斷大辟行刑獄也

又冬至前後君子安身靜體百官絕事不聽政擇吉辰而後省事

又冬至陽始起反大寒何也陰氣推而上故大寒

玉燭寶典云十一月建子周之正月冬至日南極景極長陰陽日月萬物之始律當黃鍾其管最長故有履長之慶

神農書曰冬至陰陽合精天地交讓天為不溫地為不凍君為不朝百官為不親事不可出遊必有憂悔

符瑞圖曰冬至東北方融風至

一名
夾風

崔寔四民月令曰冬至之日薦黍羔先薦玄冥以及祖

禰其進酒尊老及謁賀君師者老如正旦

又先後冬至各五日買白犬養之以供祖禰

周書時訓曰大雪之日鷓鴣猶鳴者國有訛言虎不交將帥不和荔挺不出卿士專權冬至之日蚯蚓不結君政不行麀角不解冰不藏水泉不動陰不承陽

歷義疏曰大雪十一月節月之初氣也言太陰之氣以大水凝為雪故曰大雪冬至十一月之中氣也言冬至者極也太陰之氣上干於陽太陽之氣下極於地寒氣

已極故曰冬至氣當易之是以王者閉關商旅不行以
其陽氣乘踊君壽益長是以冬賀也亦以日之行天至
於巽維東南角極之於此故曰冬至

顏師古匡謬正俗曰鄭氏箋云鵲之作巢冬至加功至
春乃成此言始起冬至加功力為巢蓋直言耳而劉昌
宗周讀等音加為架名從以構為義則不應云架功也
晉書曰周嵩母李氏常冬至飲酒舉觴賜三子曰吾本
渡江託足無所不謂爾等並貴列吾目前吾復何憂嵩

起曰恐不如尊旨伯仁志大而才短名重而識闇好乘人之弊此非自全之道嵩性抗直亦不容於世唯阿奴碌碌當在阿母目下耳阿奴謨小字也後果如其言

沈約宋書曰魏晉冬至日受萬國及百僚稱賀因小會其儀似歲朝也

又冬至朝賀享祀皆如元日之儀又進履襪作赤豆粥

荆楚記云共工氏有不才子以冬至日死為人厲愛赤豆故作粥禳之

南史曰梁傅岐為始新令有囚當死會冬至岐乃放其

還家曹掾固爭曰古者有此今不可行岐曰其若負信
縣令當坐竟如期而反太守深相嘆異遽以狀聞

梁書曰席闡出為東陽太守在郡有能名冬至悉放獄
中囚依期而至

齊書曰庾狄伏連冬至之日親表稱賀其妻為設豆餅
伏連問此豆何因而得妻對曰於馬豆分減伏連大怒
唐玄宗實錄曰上御含光殿受朝太史奏曰朔日至歷
數之先嘉辰之會按樂汁圖徵云朔日冬至聖主厚祚

又按春秋感精符云冬至陰雲初寒有雲迎日者來歲大美此並聖德光被上感天心請付有司以彰嘉瑞從之

洽聞記曰赤土國直崖州南渡海經雞籠島冬至之日影在北夏至之日影在南開戶皆向北

黃帝針灸經云冬至日風從南來者名為虛賊傷人也風角書曰候赦法冬至後盡丁巳之日有風從巳上來未滿三日以上必有大赦

養生要集曰南陽張平子云冬至陽氣歸內腹中熱物入胃易消化

又通歷數家算法推考其紀從上古天元訖十一月甲子夜半朔冬至日月若連璧

晉潘尼長至詩曰渾儀賦四氣玉衡運招搖靈晷修期夕日南始今朝

宋鮑照冬至詩曰景移風度改日至晷遷換眇眇負霜鵲皎皎帶雲鴈長河夜闌干層水如玉岸哀哀故老容

慘慘愁歲晏

陳新塗妻李氏冬至詩曰靈象尋數迴四氣平運散陰
律鼓微陽大明啟修旦感與時來興心隨逝化歎式宴
集中堂嘉賓盈朝館

魏曹植冬至獻襪表曰伏見舊儀國家冬至獻履貢襪
所以迎福踐長先臣或為之頌臣既玩其嘉藻願述朝
慶千載昌期一陽嘉節四方交泰萬彙昭蘇亞歲迎祥
履長納慶不勝感節情繫帷幄拜表奉賀并獻紋履七

納機若干副上表獻以聞謹獻

太平御覽卷二十八